

# Esdras-Nehemias

Nos tin ku komprendé ku en general e bukinan di Génesis te Ester ta aparesé den un òrdu kronológiko den Tèstamènt Bieu. E bukinan aki ta konta historia for di kreashon te mas òf ménos 400 B.C. Pues, e siguiente tres buki (Esdras, Nehemias i Ester) ta konkluí e sekshon históriko di Tèstamènt Bieu. Nan ta konta di e regreso di hudiunan for di eksilio, rekonstrukshon di e tèmpel i Yerusalèm. Nan ta kubri un periodo di mas of ménos shen aña, for di 536 te 432 B.C. E buki di Ester ta konta di susesonan di hudiunan ku no a regresá ku a afektá hudiunan durante e era aki den impero di Persia.

Ma e siguiente bukinan—Jòb te Malakias—no ta aparesé den un òrdu kronológiko den Tèstamènt Bieu. Maske esei ta bèrdat, ta un echu ku e último tres profeta ku a skirbi buki den Tèstamènt Bieu (Hageo, Zakarias, i Malakias) a profetisá durante e era aki Esdras, Nehemias i Ester. (Malakias ta poko aña despues—mas òf ménos aña 400 B.C.)

Hopi evento a sosodé despues di 400 B.C. Ma nada di esei ta skirbí den Tèstamènt Bieu. Ta komo sifuera tabatin un era di 400 aña di silensio—ku Dios no a papia ku Su puebel. Na final di e 400 aña, Tèstamènt Nobo ta kontinuá ku e relato históriko ku nasementu di Juan Boutista i nasementu di Jesus.

## I. TRASFONDO DI BUKINAN

Asiria a konkistá Israel, e nashon di nort, a deportá su poblashon, i a plamá nan na diferente parti, prinsipalmente den e area ku awendia ta konosí komo Irak. Añanan despues, tabata turno di e nashon di Juda. Nabukodonosor a rondoná Yerusalèm dia 10 di yanüari, 587 i a logra kaptur' é 9 yüli, 586 B.C. Juda su poblashon tambe a wòrdu deportá.

Un punto ku ta un yudansa pa komprendé ta ku tabatin diferente deportáshon di Juda—algun tabata deportá mas promé ku otro. Tabatin por lo ménos kuater diferente okashon ku e puebel hudiu di Juda a wòrdu deportá.

### 1. Promé deportáshon - 605 B.C.

Daniel 1:1-2 ta konta di esaki. E deportáshon aki a sosodé den e di tres aña di reinado di Joakim. Ta parse ku Joakim lo a muri promé ku el a wòrdu deportá. Daniel tabata un di esnan ku a wòrdu deportá e tempu aki. E deportáshon aki a tuma lugá tempu ku Nabukodonosor a bira rei di impero di Babilonia.

### 2. Di dos deportáshon - 597 B.C.

Yu di Joakim a bira rei di Juda. Su nomber tabata Joakin i Nabukodonosor atrobe a rondoná e stat di Yerusalèm. Joakin a entregá n'e i el a wòrdu deportá huntu ku 10.000 otro persona (2 Rei 24:8-17). Despues di 37 aña, Joakin a haña bon tratu serka e rei di Babilonia promé ku el a muri ayanan (2 Rei 25:27-30).

### 3. Di tres deportáshon - 586 B.C.

Esaki tabata e konkista prinsipal di Yerusalèm dor di Babilonia, tempu ku Zedekias tabata rei. E stat di Yerusalèm a wòrdu destruí finalmente i su puebel deportá. Esaki ta deskribí den diferente teksto (2 Reinan 25:1-21; 2 Krónikanan 36:15-21; Jeremias

52:1-29).

4. Di kuater deportáshon - 581 B.C.

Jeremias 52:30 ta deskribi un otro deportáshon ku a tuma lugá den e di 23 aña di reinado di Nabukodonosor.

Ta klaro ku Babilonia a deportá algun habitante di reino di Juda, ma no tur. Nos no sa e sifra total. Algun estudiante di Beibel ta kalkulá ku e kantidat no tabata mas ku 70.000 hòMBER, muhé, i mucha.

E pueblo hudiu a keda den eksilio pa un period di mas òf ménos shete dékada (Jeremias 25:11). Dios a obra di tal forma ku nan por a regresá na e tera ku El a primintí Abraham, Isaak i Jakòb. E siguiente tres buki ta trata ku e periodo di regreso i despues. Laga nos pone e bukinan aki den un perspektiva kronológiko. Esaki por yuda nos mira e man di Dios den historia. Nota e siguiente fechanan:

539 B.C.	Siro di Persia a konkistá impero di Babilonia
538 B.C.	Dekreto di Siro permitiendo rehénnan pa regresá na nan mes pais
536 B.C.	49.897 hudiu a regresá na Yerusalem for di Babilonia bou guia di Zorobabel
536 B.C.	Den e di shete luna, nan a konstruí a altar i a hasi sakrifisionan
535 B.C.	E hudianan a kuminsá konstruí e tèmpeL na Yerusalem, anto a para
535-520 B.C.	Un periodo di luchanan ekonómiko i polítiko
520 B.C.	Profetanan Hageo i Zakarias a motivá e hudianan pa sigui konstruí e tèmpeL
515 B.C.	Konstrukshon di tèmpeL kompletá
478 B.C.	Ester a bira reina di Persia
473 B.C.	Ester a salba e hudianan for di matansha
457 B.C.	Esdras a hasi su viaha di Babilonia pa Yerusalem
444 B.C.	Nehemias a hasi su viahe pa Yerusalem i a konstruí e murayanan
432 B.C.	Nehemias a hasi su di dos viahe pa Yerusalem
400 B.C.	Ministerio di profeta Malakias

Esdras, den kapitulonon 3-6, ta konta di un periodo di tempu ku Zorobabel i Jesús tabata rekonstruí tèmpeL (536-515 B.C.) maske e mes no a biba e tempu ei. E saserdote Esdras a regresá na Juda 13 aña promé ku Nehemias a hasi e mésun viahe. Esdras su buki tambe ta konta di e periodo di tempu ku Nehemias tabata gobernado i e mes tabata saserdote na Yerusalem (457-432 B.C.). E buki di Nehemias tambe ta konta di e mésun periodo di tempu, 457-432 B.C. En kontraste, e eventonan deskribi den e buki di Ester a tuma lugá promé ku e eventonan deskribí den e bukinan di Esdras i Nehemias a tuma lugá.

Nehemias a yega Yerusalem kasi shen aña despues ku e promé hudianan a regresá na Juda. Ma te ainda e murayanan di Yerusalem no a wòrdu rekonstruí. E puebel hudiu tabata indefenso kontra nan enemigunan. Pesei Nehemias a bin motivá nan pa konstruí e murayanan.

E eventonan deskribí den e bukinan di Esdras, Nehemias i Ester no a tuma lugá durante tempu di impero di Asiria ni impero di Babilonia. Nan a sosodé despues ku e medo-personan a konkistá Babilonia...pues, durante impero media-persia.

Lo ta bon pa nos haña un mihó bista di historia di e impero aki. Siro (559-530 B.C.) tabata e promé mandatario di e impero aki. Isaias a profetisa tokante Siro (Isaias 44:28 - 45:3). Siro a eredá e trono di Persia di su tata. Despues di derotá Media (549 B.C.), el a forma e impero media-persia. Dia 12 di òktober 539 B.C. el a konkistá e siudat di Babilonia. Daniel 5 ta deskribí un tiki di loke a sosodé e anochi ku e trupanen di media-persia a konkistá Babilonia. Siro a apuntá Dario komo rei riba e kaldeonan, bou di su outoridat. Pues, Dario tabata e mandatario di Babilonia den Daniel 6.

Asiria i Babilonia a mantené òrdu dor di opreshon i deportáshon. En kontraste, Siro su pólisa tabata pa enkurashá e puebelnan konkistá pa regresá na nan propio paisnan. Kasi mes ora ku el a konkistá Babilonia, el a duna e hudianan libertat pa regresá na Juda.

E hudiunan a probechá di e polisá aki. Siro a duna libertat pa nan bolbe na nan tera i konstruí e tèmpele (2 Krónikanan 36:22-23; Esdras 1:1-4). El a debolbé e pertenensianan di tèmpele (Esdras 1:7-11; 6:5) i asta a hasi un kontribushon pa konstruí e tèmpele (Esdras 6:4). Komo resultado kasi 50.000 hudiu (Esdras 2:64-65) a regresá na nan tera bou liderato di Zorobabel i Jesúa. E siguiente rei di impero di media-persia, Kambises (530-522 B.C.), a konkistá Egipto. Pusíbelmente esaki ta e Artaherhes menshoná den Esdras 4:7,11,23. Despues ku el a kometé suisidio, Gaumata (Smerdis falsu) a reina pa 8 luna so, ma a okashoná un guerra sivil. Dario I (522-486 B.C.), konosí tambe komo Dario e Grandi, a pone un páro na e guerra sivil i a skapa e impero. Dario I ta menshoná den Esdras 5:6 – 6:15.

E siguiente rei tabata esun ku buki di Ester ta menshoná, Asuero. E ta konosí den historia komo Herhes I (486-465 B.C.). Asuero a bringa kontra Gresia. Henter buki di Ester ta tuma lugá durante su reinado. Ester a bira reina di Asuero. Esdras 4:6 ta menshon' é tambe.

Artaherhes I (464-424 B.C.) a siguie (Esdras 7:1 – 10:44). Ta pusíbel ku Artaherhes I tabata yu di Ester. Ester, siendo muchu mas hoben ku Asuero ora nan a kasa, e por a biba hopi mas aña despues di Asuero su morto i por tabatin hopi influencia durante reinado di Artaherhes I. Ta masha visto ku Artaherhes I a trata e hudiunan masha favorabel. Talbes pa motibu di Ester su influencia, Esdras por a regresá na su tera na 457 B.C. E eventonan deskribí den e buki di Nehemias tambe a tuma lugá durante su reinado... talbes influenciá pa Ester. I pusíbelmente ora Nehemias 2:6 ta menshoná “*e reina sinta banda di dje*”, e ta referí na Ester.

Herhes II a reina pa un periodo kortiku (424 B.C.) i tabata sigui pa Dario II (424-404 B.C.). Kisas e eventonan di Nehemias 13:6-31 (Nehemias su di dos viahe) a sosodé durante su reinado. E último reinan di impero di media-persia no tabata fuerte. Nan tabata Artaherhes II (404-359 B.C.), Artaherhes III (359-338 B.C.), Arses (338-336 B.C.) i Dario III (336-331 B.C.). Alexander e Grandi (di Masedonia) a derota Dario III den e bataya famoso na Arbela, serka di Ninive na aña 331 B.C. Esaki ta marka final di impero di media-persia i inisio di impero di Gresia.

Meskos ku tabatin vários deportáshon, Beibel ta menshoná diferente grupo ku a regresá na e tera primintí for di eksilio. (1) E promé grupo tabata enkabesá pa Zorobabel i Jesúa (539/538 B.C.). Segun Mateo 1:12, Zorobabel tabata nietu di Joakin (tambe konosí komo Jekonias). Zorobabel lo tabata rei di Juda si Babilonia no a konkistá e pais. Kasi 50.000 hudiu a regresá na nan pais na Israel. (2) Esdras tabata lider di e di dos grupo ku a regresá. Esaki lo a tuma lugá na aña 457 B.C. Esdras 8 ta konta e storia aki. (3) Nehemias a enkabesa un otro grupo—talbes un grupo muchu mas chikitu, na aña 444 of 443 B.C. (4) Algun aña despues, Nehemias a regresá na Susa i despues a bolbe bèk na Israel (433 B.C.) segun Nehemias 13:6-31.

Nos tin ku komprendé ku no tur hudiu a bolbe na Israel. Hopi hudiu a preferá keda biba na e tera unda nan a wòrdu deportá pasobra (segun Josephus) “nan no tabata despuesto pa laga nan poseshonnan”. Den otro palabra, nan a bira riku durante e tempu di deportáshon, i nan a preferá keda unda nan por hana entrada na lugá di regresá na e pais ku Dios a primintí nan.

Esnan ku a bolbe na Israel a wòrdu yamá “hudiu” pa promé biaha. Esaki ta un forma di e nòmber “Juda”.

Pues, maske e buki di Ester ta último den e trio di buki aki, ta parse ku e eventonan deskribí den buki di Ester a tuma lugá promé ku e relatonan di Esdras i Nehemias. E bukinan di Esdras i Nehemias ta konta di e hudiunan ku a bolbe na Yerusalèm i Juda. E buki di Ester ta konta di e hudiunan no a bolbe ainda. Talbes e storia di Ester probabelmente ta tuma lugá meimei di kapitulonnan 6 i 7 di Esdras—un periodo di 60 aña.

Esdras i Nehemias tabata kolega na Yerusalèm ku a trata ku tantu e parti spiritual komo físiko. Esdras, e saserdote-eskriba, tabata un eksperto den Skritura. Nehemias tabata gobernadó di Yerusalèm

## II. BUKINAN ÒF BUKI?

Originalmente hudiunan a konsidera e bukinan di Esdras i Nehemias un solo buki. Nos no sa sigur ki tempu presis e bukinan a wòrdu separá. Den e tradukshon griegu di Tèstament Bieu, konof komo Septuiginta (of LXX) nan tabata un solo buki. E tradukshon aki a aparesé promé ku Hesus a nase. Ma Origen (185-254 A.D.) a papia di nan komo dos buki.

Nota algun evidensia ku nan tabata un buki originalmente. (1) E eskribanan di antes tabata skirbi nan komentarionan di kada buki na final di e buki. No tin nada skirbi kaminda buki di Esdras ta klousurá. E komentarionan pa tantu Esdras komo Nehemias ta aparesé despues di Nehemias. (2) E eskribanan tambe a indiká unda mitar ta keda den un buki. Nan a indiká ku mitar ta keda na Nehemias 3:32, nèt meimei di Esdras i Nehemias. (3) E buki di Nehemias ta kontinuá ku historia presis unda e buki di Esdras a klousurá.

Tog tin interogante si nos mester konsiderá nan un solo buki. Por ehèmpel, e lista di nòmbernan listá den Esdras 2 ta ripití den Nehemias 7:6-70. Si nan tabata un solo buki, pakiko e ripitishon di e lista den e mésun buki? Pakiko buki di Nehemias ta skirbí for di un punto di bista mas sivil i sekular ku buki di Esdras?

Nos no a solushoná e interogante si Esdras-Nehemias tabata un òf dos buki originalmente! Ma komo ku hopi di e informashon ta similar i komo ku hopi outor ta trata ku e bukinan huntu, ta mas fásil pa nos studia e bukinan aki huntu.

Si nan ta dos buki, por bisa ku kada buki ta karga nòmber di e persona prominente dentro di su páginanan: Esdras i Nehemias.

Henrietta Mears ta observá ku ambos buki ta kuminsá na Persia i ta klousurá na Yerusalèm. Foko di tur dos ta riba un hòmber di Dios. Tur dos storia ta originá ku dekreto di un rei di Persia. Tur dos buki ta konta di un proyekto di konstrukshon. Tur dos buki ta kontené un orashon umilde i konfeshon. I ambos buki ta klousurá ku purifikashon di e pueblo hudiu.

### III. SKIRBIMIENTU DI E BUKINAN

#### A. OUTOR

E teksto no ta indiká ken eskritor di 1 & 2 Krónikanan, Esdras i Nehemias tabata. Ma tin diferente teoria:

##### 1. Esdras tabata outor di 1 & 2 Krónikanan, Esdras i Nehemias

Talbes e kuater buki tabatin un solo outor. Maske nomber di Esdras no ta aparesé den e buki ku ta karga su number te 7:1, bastante teólogo ta haña ku e bukinan di 1 i 2 Krónikanan, Esdras, i Nehemias tin e mésun outor-kompilado, i ku e persona ei tabata Esdras.

- E echu ku 2 Krónikanan (36:22-23) ta klousurá ku e mésun palabranan ku ta habri e buki di Esdras talbes ta un indikashon ku Esdras (1:1-3) a skirbi tantu e bukinan di Krónikanan komo Esdras. I e historia ku a kuminsá den Krónikanan ta kontinuá den Esdras i Nehemias.
- Segun punto di bista di Talmud hudiu, Esdras ta konsiderá e eskritor.
- Den buki di Esdras, e outor ta skirbi kapítulonan 1-7 komo sifuera e no tabata un partisipante. (El a skirbi di loke *nan* a hasi.) Ma kuminsando ku 7:28, e outor ta skirbi komo sifuera e ta un partisipante. (El a skirbi di loke *nos* a hasi.)
- Komo ku Esdras a wòrdu eduká komo un eskriba i un saserdote, sin duda tabata kapasitá i kalifika pa skirbi e bukinan. Pa motibu di su trabou, e por tabatin aksesu na dokumentonan di impero di Persia. E tabata tabata un studiante dediká i un lider motivá.
- Ta interesante ku e outor di Krónikanan, Esdras i Nehemias ta hopi interesá pa ku e levitanan. Levitanan ta mensioná solamente dos biaha den 1 & 2 Samuel (1 Samuel 6:15; 2 Samuel 15:24) i solamente un biaha den 1 & 2 Reinan (1 Reinan 8:4). En kontraste, levitanan ta mentá 86 biaha 1 & 2 Krónikanan, 21 bes den Esdras i 37 biaha den Nehemias. Di loke nos sa di Esdras, komo ku e mes tabata un levita i saserdote, sin duda e lo tabata interesá pa ku e saserdosia i levitanan.

Esdras sigur por tabata outor di e bukinan aki.

Esdras sigur e tabata desendiente di Aaron (7:1-5). Segun tradishon hudiu, e tabata sumosaserdote na Babilonia promé ku el a regresá na e Tera Primintí. Siendo den eksilio huntu ku e otro hudiunan, isolá for di tèmpep (tèmpep tabata destruí) el a originá e sistema di adorashon den snoa. Tambe segun tradishon hudiu, el a kolektá e Skrituranan i a forma Tèstament Bieu.

2. Esdras a skirbi 1 & 2 Krónikanan i Esdras; Nehemias a skirbi e buki ku ta karga su nòmber

Un otro pusibilidad ta ku Esdras a skirbi 1 & 2 Krónikanan i buki di Esdras, ma Nehemias a skirbi e buki di Nehemias. Klaramente e outor ta hasi uso di informashon ku Nehemias lo tabatin òf lo tabata sa.

Nehemias a nase durante eksilio di e puebel di Dios. Su number ta nifiká “konsuelo di Jehová”. Na un edat hóben, Nehemias lo a haña un responsabilidat sumamente grandi—pa ta koperu di rei persiko, Artaherhes (Nehemias 1:11). Nehemias tabata un hòmpèr deboto. Ta visto den e buki di Nehemias ku e tabata un hòmpèr di orashon (1:4-11; 2:4; 4:4-5,9; 5:19; 6:9,14; 13:14,22,29,31). Ripitidamente el a hasi orashon den tur klase di sirkunstansia. E tambe tabata un bon lider. E tabatin un vishon kiko mester sosodé, el a motivá hende pa traha pa kumpli ku e vishon, e tabata un atministradó i organisadó tremendo i a para firme kontra menasanan i peliger ku konfiansa den Señor.

Ora Nehemias a yega na e tera hudiu (444 B.C.), Esdras ya kaba tabat’ei. E buki di Nehemias ta kontinuá ku e storia despues di un pouza di 12 aña meimei di Esdras i Nehemias. Ora Nehemias a regresá na Israel pa di dos biaha (433 B.C.), Malakias lo tabata un lider spiritual. Ta parse ku Malakias i Nehemias ta deskribí ta e mésun era.

3. Esdras tabata outor di Esdras; Nehemias tabata eskritur di Nehemias i un òf otro disipel di Esdras a skirbi 1 & 2 Krónikanan

Ta pusíbel ku un alumno di Esdras a komilá e bukinan di 1 & 2 Krónikanan—talbes despues di morto di Esdras.

E teksto no ta indiká ken e eskritur di e bukinan aki ta. Kualke di e teorinan aki ta pusíbel.

## **B. IDIOMA**

Nos sa ku Tèstament Nobo a wòrdu skribí na idioma griegu i Tèstament Bieu a wòrdu skribí na idioma hebreo. Ma esei no ta totalmente bèrdat. Tin teksto den Tèstament Bieu ku ta na idioma armeo. Esei ta e kaso ku Esdras 4:8 – 6:18 i 7:12-26. Mayoria di e tekstonan aki ta dokumento ku a wòrdu inkluí sin tradusié. (Daniel 2:4 – 7:28 ta un otro teksto ku a wòrdu skribí originalmente na idioma armeo.)

## **IV. FUENTENAN DI E BUKINAN**

Outor di e bukinan aki tabata hopi bon dokumentá. El a hasi uso di diferente dokumento preparando e buki.

### **A. SU MES EKSPERENSA**

Tin sekshon den e dos buki aki ku e outor ta papia klaramente di su mes persona, usando palabranan manera “ami” of “mi”. Esdras 7:27 - 9:15 ta un ehèmpel di esei. Promé i despues di e sekshon aki e outor ta skirbi den “derde person” - 7:1-26; 10

E buki di Nehemias ta hasi esaki ku frekuensia tambe. Konstantemente e outor ta papia di “mi” i “ami” (1:1-7:5; 11:27-43; 13:4-30).

Pues, eskritor di e bukinan aki sigur a hasi uso di relatonan verbal òf por eskrito di Esdras i Nehemias. Talbes Nehemias tabatin un dagbuk ku el a skirbi ku Esdras tabatin oportunitat pa lesa.

## **B. DOKUMENTONAN ARAMEO**

Nos sa ku Tèstament Bieu en general a wòrdu skirbí na idiomanan hebreo. Ma tin sekshonnan den e teksto di Esdras ku tabata skirbí na idioma arameo originalmente. E úniko otro biaha ku esaki ta sosodé den Beibel ta Daniel kapítulonon 2-7. Arameo tabata e idioma diplomatiko di e era ei.

E buki di Esdras ta inkluí shete dokumento òf karta ofisial. (Tur di e dokumentonan ta aparesé na idioma arameo den e buki, ku eksepsion di esun promé.) 1) Proklamashon di Siro (Esdra 1:2-4); 2) akusashon di Rehum kontra e hudiunan (Esdras 4:11-16); 3) kontesta di Artaherhes (Esdras 4:17-22); 4) rapòrt di Tatnai (Esdras 5:7-17); 5) memorandum tokante proklamashon di Siro (Esdra 6:2-5); 6) kontesta di Dario na Tatnai (Esdras 6:6-22); i 7) rei su outorisashon pa ku Esdras (Esdras 7:12-26).

## **C. LISTANAN**

E bukinan ta kontené nuebe lista: 1) Lista di artíkulonon di tèmpel (Esdras 1:9-11); 2) lista di eksilionan ku a bolbe na e tera hudiu (Esdras 2:1-70); 3) lista den genealogia di Esdras (Esdras 7:1-5); 4) lista di kabesnan di kasnan (Esdra 8:1-14); 5) lista di hudiunan ku a kasa ku paganonan (Esdras 10:18-43); 6) lista di esnan ku a yuda konstruí e murayanan (Nehemias 3); 7) lista di esnan ku a seya e aliansa (Nehemias 10:1-27); 8) lista di habitantenan di Yerusalèm i otro suidat (Nehemias 11:3-36); i 9) lista di saserdotenan i levitanan (Nehemias 12:1-26).

## **V. FECHA DI E BUKINAN**

E bukinan di Esdras i Nehemias ta kubri un periodo di bastante aña. Jadua ta nòmber di un persona ku a biba mas na final di e periodo ei (Nehemias 12:11,22). Un persona ku tabata yama Jadua tabata sumosaserdote durante reinado di Dario III (338-331 B.C.). Si Jadua ta e sumosaserdote ei, anto esei ke men ku e buki a wòrdu skirbí despues di e fecha ei. Òf ta pusibel ku un sekretario di tèmpel por a agregá e nòmbernan despues ku e buki a keda kompletá.

Ma di otro banda, esei por tabata un otro Jadua. Nos ta haña ku ta mas probabel ku e buki a wòrdu skirbí-kompilá entre 457-400 B.C. Talbes Esdras a wòrdu skirbí 457-444 B.C. i e buki di Nehemias skirbí entre 424 I 400 B.C.

## **VI. PROPOSITO DI E BUKINAN**

Gleason Archer ta haña ku proposito di e bukinan ta pa proveé un rekòrt di e rekonstrukshon di e teokrasia hebreo riba e fundeshinan físiko i spiritual di pasado.

Sin duda un otro proposito di e bukinan di Esdras i Nehemias ta pa mostra kon Dios den Su fieldat a kumpli ku Su promesa pa restorá Israel bèk den nan propio tera despues di 70 aña den eksilio (2 Krónikanan 36:21; Jeremias 25:11-14; 29:10-14)!

E echu ku Dios ta soberano ta destaká! Méskos ku Dios a kastigá Su puebel dor di mandatarionan pagano, awor El a pone den nan kurason pa restorá e puebel hudiu bèk na nan mes tera. Dios tambe a prepará lídernan (Zorobabel, Esdras i Nehemias) i profetanen (Hageo i Zakarias) pa kumpli ku Su restorashon! E bukinan tambe ta mostra kon Dios a bendishoná Su puebel ku a regresá ora nan a siguiE!

## **VII. STRUKTURA DI E BUKINAN**

- I. E promé regreso di hudiunan for di eksilio—bou guia di Zorobabel - Esdras 1-2
- II. Restorashon di adorashon di Jehova - Esdras 3-6
- III. Di dos regreso di hudiunan for di eksilio—bou guia di Esdras - Esdras 7-10

- IV. Restorashon di murayanan di Yerusalèm - Neh 1-7
- V. Reformashon di Esdras i Nehemias - Neh 8-13

Irving Jensen a prepará un struktura interesante pa buki di Esdras:

- I. Restorashon Bou Guia di Zorobabel – Esdras 1-6
  - A. E Viahe – Esdras 1-2
  - B. E Trabou – Esdras 3-6
    - 1. E Trabou Kuminsá – 3:1-13
    - 2. E Trabou Oponé – 4:1-24
    - 3. E Trabou Kontinuá – 5:1-6:12
    - 4. E Trabou Kompletá – 6:13-22
- II. Reformashon Bou Guia di Esdras – Esdras 7-10
  - A. E Viahe – Esdras 7-8
  - B. E Trabou – Esdras 9-10

Un struktura simpel di e buki di Nehemias ku por klaria nos perspektiva ta:

- I. Nehemias Su Promé Atministrashon – 1:1 – 12:47
- II. Nehemias Su di Dos Atministrashon – 13:1-31

## VIII. KONTENIDO DI E BUKINAN

E promé seis kapítulo di Esdras ta trata ku historia. E bukinan di Krónikanan a konta di e reinan di Juda te tempu ku Yerusalèm i temple a wòrdu destrui i e puebel hudiu hibá den eksilio dor di Nabukodonosor, rei di Babilonia. E buki di Esdras ta ignorá e setenta aña di eksilio i ta kuminsá ku e storia regreso di hudiunan na nan tera—pues, eventonan ku a sosodé promé ku e saserdote-eskriba Esdras a yega na Yerusalèm.

Den Esdras 1:1-4, rei Siro ta hasi su proklamashon ku pueblonan katibu por regresá na nan pais natal. Maske Siro u proklamashon a regard tur pueblo den eksilio, e pueblo hudiu ta mensioná spesífikamente aki. Kapítulo dos ta duna un lista di e hudiunan ku a regresá i e regalonan ku nan a hiba huntu ku nan. Pronto e hudiunan a kuminsá hasi preparahson pa konstrukshon di e tèmpel. E promé paso tabata pa lamta un altar (3:1-7). Despues nan a pone e fundeshi pa e tèmpel (3:8-13). E samaritanonan, desendientenan di hudiunan i paganonan ku reinan di Asiria a manda pa habitá Israel despues di konkísta di e nashon ei, a logra pone un páro na e konstrukshon dor di nan akusashonnan (Esdras 4). Añanan despues, e profetanan Hageo i Zakarias a motivá e hudiunan pa sigui ku e konstrukshon (5:1-17). Rei Dario I a duna nan pèrmiso i pronto konstrukshon di e tèmpel tabata kompletá (6:1-22).

Kapítulonon 7-10 ta eventonan ku Esdras mes a eksperensiá. Kasi 60 aña despues ku konstrukshon di e tèmpel a keda kla, Esdras ku aprobashon di rei, a regresá na e Tera Primintí pa e siña e hudiunan Palabra di Dios (Esdras 7-8).

Ora Esdras a yega Juda, el a bin haña sa ku e saserdotenan, levitanan, i mandatarionan a kasa ku paganonan—algu ku Dios a prohibí nan di hasi. Entre otro, tabata kasamentu ku paganonan ku a hiba e puebel di Dios den kaminda di idolatria, nèt loke a okashoná ku Dios a laga nan wòrdu deportá. Porfin, despues di tantu aña, nan a haña chens bo regresá for di eksilio. Inkreíbelmente, ata nan ta kulpabel di e mésun pikánan ku a kousa e deportáshon.

Esdras su reformashon ta deskribí den Esdras 9-10. Su medidanan tabata severo, sinembargu efektivo. El a insistí pa nan repintí i bandoná nan esposanan pagano. Desde e tempu ei, en general, hudiunan hamas a regresá na idolatria...asta te awe!

Esdras a inisiá mas reformashon. Segun tradishon hudiu, Esdras tabata esun ku a inisiá e konsepto di adorashon den snoanan, i e tabata presidente di e “Gran Snoa”.

Nehemias ta nfiká “SEÑOR ta konsolá”. E tabata kopero di rei Artaherhes I, un puesto di gran onor i importansia. Entre otro, esun ku tabatin e puesto ei mester ta un persona konfiá

pasobra, entre otro, e tabata esun ku a smak e biña di rei promé ku rei a beb'é pa sòru ku su bibida no tabata venená.

Ora Nehemias a tende di e kondishon deplorabel di Yerusalem for di bishitantenan na kapital di Persia, e tabata hopi tristu i a pidi rei pèrmiso pa bai rekonstruí Yerusalem.

Nehemias tabata un hòmber di orashon. Den kada sirkunstansia ku el a hañ'é, su promé reakshon tabata pa hasi orashon (1:4; 2:4; 4:4,9; 6:9,14). Nehemias a hasi orashon pa kuater luna promé ku el a hasi su petishon na rei (1:1; 2:1). Dios a kontestá su orashon.

Ora el a yega Yerusalem, el a inspekshoná e murayanan anochi i a urgi e pueblo hudiu pa konstruí e murayana pa nan no keda indefenso mas (2:1-20).

Nehemias 4-7 ta konta di e konstrukshon di e muraya i oposishon kontra e konstrukshon di parti di enemigunan di e hudianan. Tabatin oposishon den forma di chèrchi i rabia (4:1-9), deskurashamentu (4:10-23), egoísmo (5:1-19), i astusia (6:1-14). Ma apesar di e kontratiempo i menasanan, Nehemias a motivá e pueblo pa sigui traha. Nan a traha di dia i anochi pa kompletá e trabou. I nan a logra rekonstruí e murayanan den 52 dia (6:15)—142 aña despues ku e murayanan a wòrdu destruí (586 B.C.). Probabelmente nan no a konstruí e murayanan komo un konstrukshon nobo. Ta hopi probabel ku e fundeshi tabat'ei kaba, i nan a traha riba esei.

Kapítulo 7 ta un registro di e hendenan ku a regresá huntu ku Zorobabel.

Despues di rekonstruí e murayanan, Nehemias i Esdras a reuní e puebel. Kapítulonon 8-9 ta deskribí e konferensia di shete dia. Kada mainta, Esdras i su ayudantenan a lesa i splika Palabra di Dios pa e puebel hudiu. Komo resultado, e puebel a repintí, i tabatin revivamentu. Esaki a resultá den un pakto di e pueblo pa obedesé Dios (Nehemias 10) i dedikashon di e murayanan di Yerusalem (kapítulo 11-12).

Ku kompletashon di konstrukshon di e muraya ront Yerusalem, un diesmo parti di e poblashon e bin biba na Yerusalem. Gobernashon i servisio den tèmpep tabata organisá.

Nehemias tabata ousente for di Yerusalem pa un periodo di tempu deskonosí. (El a bai bèk serka e rei ku a dun'é pèrmiso pa bai.) Ora el a regresá, el a enkontrá diferente problema. Kapítulo 13 ta konta di algun korekshon ku Nehemias, e gobernadó, mester a hasi relashoná ku e diesmo, sabat, i matrimonio ku paganonan.

Josefus ta bisa ku Nehemias a goberná Juda pa e restu di su bida, i a muri na un edat hopi grandi.

## **IX. OPSERVASHONAN DI E BUKINAN**

### **A. HUDIUNAN**

E puebel di Dios no tabata konosí komo “hudiunan” te tempu di koutiverio. Pasobra Juda tabata e tribu prominente, un persona di tribu di Juda a haña e number “hudiu”. Despues a para bira ku kualke persona ku a biba den e area konosí komo Juda tabata konsiderá un “hudiu”. Despues di e era di nan koutiverio, israelitanan a wòrdu yamá “hudiunan”.

Por mira e palabra “hudiu” i “hudiunan” ku frekuensia den e bukinan di Esdras i Nehemias. Jeremias ta referí na “hudiunan” den e era despues di konkísta di Yerusalem. Ester i Daniel tambe ta usa e palabra. Ora nos ta yega na Tèstament Nobo, “hudiunan” tabata e number komún pa e puebel di Dios.

### **B. DIVORSIO**

Na aña 536 B.C., Zorobabel a guia un grupo di hudiu bèk na nan tera. Ochenta aña despues, Esdras a yega na Yerusalem ku e di dos grupo di hudiu ku a regresá for di koutiverio. Esdras a keda di shòk (Esdras 9:3-4) ku e situashon ku el a haña: algun di e hudianan a kasa ku paganonan (adoradónan di diosnan falsu)—algu ku Dios a prohibí Israel di hasi, i a eksigí ehekushon pa esei.

Esdras a reakshoná asina fuerte kontra esaki no solamente pasobra matrimonio ku paganonan tabata desobediensia kontra Dios, ma tambe pasobra esaki tabata un di e motibunan prinsipal ku e puebel di Dios a bandon'E, a kuminsá adorá ídolonan i a wòrdu kastigá pa Dios ku



70 aña di koutiverio. E puebel hudu a bin komprendé nan piká i a divorsiá nan esposanan pagano.

E mésun situashon a tuma lugá durante tempu ku Nehemias a bai serka rei di Persia na Susa (Nehemias 9-10). Ora el a regresá na e tera hudu, el a hañ'é konfrontá ku matrimonionan entre hudiunan i paganonan atrobe. Nehemias tambe a tuma medidanan fuerte kontra esaki.

Esaki no ta husifikashon pa divorsio awendia. Dios ketu bai ta odia divorsio (Malakias 2:16). Otro teksto (1 Korintionan 7: 12-16; 1 Pedro 3:1-7) ta laga sa kon pa trata ku un situashon ku un persona ta kasá ku un persona ku no konosé Kristo komo su Salvador personal.

Ta bon pa nota ku e teksto no ta indiká presis kon e hudiunan a trata ku e situashon. Maske den tur dos kaso, tabata un desishon di e grupo pa bandoná nan esposanan pagano, kasi sigur nan a trata ku kada situashon individual. Sin duda, esposanan pagano ku a kombertí pa sigui e Dios di Israel no tabata obligá pa divorsiá.

## Literatura Konsultá

- Archer, Gleason L. Jr. *A Survey of the Old Testament Introduction* (Chicago: Moody Press, 1994), p. 418-424.
- Baxter, J. Sidlow. *Explore the Book* (Grand Rapids: Zondervan Publishing House, 1960), vol. 2, 191-265.
- Demaray, Donald E. *A Layman's Guide to Our Bible* (Los Angeles: Cowman Publishing Company, 1964), p. 89-91.
- Halley, Henry H. *Halley's Bible Handbook* (Grand Rapids: Zondervan Publishing House, 1964), p. 216-221.
- Hill, Andrew E. & Walton, John H. *A Survey of the Old Testament* (Grand Rapids: Zondervan Publishing House, 1991), p. 228-237.
- Jensen, Irvin, L. *Jensen's Survey of the Old Testament* (Chicago: Moody Press, 1978), p. 217-241.
- MacArthur, John. *MacArthur's Quick Reference Guide to the Bible* (Nashville, TN: W. Publishing Group), p. 67-76.
- Mears, Henrietta C. *What the Bible is All About* (Minneapolis: World Wide Publications, 1966), p. 143-157.
- Unger, Merrill F. *Unger's Bible Handbook* (Chicago: Moody Press, 1967), p. 254-263.
- Wright, J.S. Tenney, Merrill C. ed. "Book of Ezra", *The Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 2, p. 471-474.
- Tenney, Merrill C. ed. "Book of Nehemiah". *The Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 4, p. 406-407.
- Yamauchi, Edwin. Frank E. Gaebelin, ed. *The Expositor's Bible Commentary* (Grand Rapids: Zondervan Publishing House, 1988), vol. 4, p. 565-600.